

## **БИР МАДАНИЙ МЕЪРОС ОБЪЭКТИ ТАРИХИДАН**

*Наманган вилояти тарихи ва маданияти давлат Музейи Санъат бўлими*

*мудири*

***Д.Тўхтабоева***

Ўзбекистон маданияти, Марказий Осиё халқларининг кўп асрлик анъаналари ва турмуш тарзи билан чамбарчас боғлиқ бой тарихга эга. Буюк Ипак йўлининг чорраҳасида жойлашган Ўзбекистон худудида кўплаб меъморий ёдгорликлар, қадимий қалъа ва қасрлар, сирли ва ноёб табиат ёдгорликлари ва фолклор элементлари жойлашган бўлиб уларнинг аксарияти ҳозирда ЮНЕСКОнинг Бутунжаҳон мероси обьектлари томонидан муҳофаза қилинмоқда. Ўзбекистон мустақилликка еришганидан буён мамлакатда нафақат ёдгорликларни тиклаш ишлари орқали маданий меъросни сақлашга, балки миллий ўзига хосликни мустаҳкамлашга ва жаҳон маданиятида тан олинишига ҳам катта эътибор қаратилмоқда. Минг йиллар мобайнида, миноралар ва қадимий гумбазлар кўплаб шаҳарларнинг ташриф қоғози, шаҳар манзаралари, уларнинг диний ва маърифий муассасалари – масжид ва мадрасаларининг гўзал аксига айланди. Мустақил Ўзбекистонда, қадимий меъморларнинг ушбу ноёб асарлари, бебаҳо маданий обьектлари сифатида маҳсус мақомга эга бўлди ва улар давлатнинг алоҳида муҳофазасидир. Ана шундай маданий мерос обьектларидан Наманган шаҳрининг Лаббайтоға даҳаси, Курашхона мавзеи Намангансой соҳилида жойлашган Мулла Бозор Охунд ёдгорлиги мажмуаси халқимизнинг тафаррук масканларидан биридир. XVII асрнинг йирик мутасаввуфларидан бири олим ва шайх Мулла Бозор Охундинг тўлиқ исми Хожа Убайдуллоҳ ибн Султон Мухаммад Бобур Қорахон Мулла Бозор Охунддир. Ул зот XVI аср охири (санаси номаълум) Наманган шаҳрида таваллуд топган. Бошланғич таълимни уйида,

кейинги босқични Наманган мадрасаларида олган. Илмга ташналик уни Туркистоннинг илм-фан маркази бўлмиш Бухорога олиб келган. Бухорода донишманд олим Мирзо Баҳодир Бухорий билан танишди, ундан таълим олди. Устозини пир, ўзини мурид хисоблаб, узоқ йиллар олимнинг хизматида юрди. Мирзо Баҳодирдан иршод хатини (пирнинг ёрлиғини) олгач, Ўрта ва Яқин Шарқ мамлакатлари бўйлаб саёҳат қилди. Қошғарнинг Хўтан, Ёрканд шаҳарларида бўлди. У ерда Ҳидоятуллоҳ Офоқ Хўжа билан танишди. Наманганга қайтгач, қолган умрини имомлик ва мударрисликка, кишиларни тўғри йўлга солишдек шарафли, мashaққатли юмушга сарф этди. Мулла Бозор Охунд ўз даврининг фикҳ, ҳадис, тарих, география, илми хисоб, фароиз, адабиёт, руҳиятшунослик ва бошқа билимларни яхши эгаллаган йирик мутафаккир эди. У туркий, арабий ва форсийда ижод қилган шоир ҳамдир. Ул зот оташнафас шоир Бобораҳим Машрабга илк сабоқ берган, унинг шоир бўлиб етишишига катта ҳисса қөшган ва уни ягона Аллоҳга эътиқод, фоний дунё ҳавасларига көнгил қўймаслик руҳида тарбиялаган меҳрибон устоз эди. Мулла Бозор Охунд 1668 йил Наманганда вафот этган. Мамлакатимиз истиқлолга эришиш арафасида, 1990 йилда маҳаллий аҳоли ҳашар йўли билан Мулла Бозор Охунд мажмуаси қурилишини бошлаб юборди. Бироқ, иқтисодий танглиқ туфайли бу қурилиш ниҳоясига етмай қолди. Муқаддам бу ерда мавжуд бўлган мадраса ва мақбара XX асрнинг 30-йилларида бузиб юборилган эди. 1993 йилда меъморий мажмуани қайта тиклаш тўғрисида қарор қабул қилинди. Ўша йилнинг 25 декабря мажмуа асосий дарвоза қисмига қозик қоқилди. Қурилиш ишлари 1994 йилнинг 18 майда тутатилди. Уни Наманган бош меъмори Абдужаббор Абдуғаффоров бошчилигидаги ёш, иқтидорли меъмор Одилжон Қодиров амалга оширди. Мажмуа қурилишида Уста Фозил Намангонийнинг фарзанди Уста Турғунбой Фозилов ҳамда Уста Неъматулла Қўчқоровлар етакчилигига энг малакали қурувчилар иштирок этдилар. Ушбу меъморий ёдгорлик Наманган вилояти ҳокимининг 2006 йил 5

майдаги 200-сонли қарори билан маҳаллий тоифадаги маданий мерос обьекти сифатида давлат муҳофазасига олинган.

Мулла Бозор Охунд ёдгорлик мажмуаси 3 қисмдан иборат:

Асосий кириш дарвозаси пишиқ ғиштдан масжидга кириш жойида қурилган.

Уч гумбазли, ўртадаги гумбаз каттароқ бўлиб, пастки қисми дарвоза учун мўлжалланган. Дарвозанинг икки томонида мезана шаклидаги баланд қуббадор устунлар жойлашган. Бошқа икки гумбаз ости  $3,5 \times 3,5$  метрли хужралардан иборат. Хужраларнинг давоми сифатида хоналар қурилган ( $9 \times 3,5$  метрли).

Жомеъ масжиднинг асосий катта хона-хонақоҳи ертўлали, пишиқ ғишт ва темир-бетон панелдан қурилган. Ўлчами  $30 \times 24$  метр. Сатҳи 720 квадрат метр. Уч томони айвон. Уст унлар ва пештоқи миллий безаклар бериб пишиқ ғиштдан тикланган. Ўлчами  $36 \times 6$  метр ва  $24 \times 6$  метр, сатҳи 576 квадрат метр. Асосий дарвозадан киришда қибла томонда айвонга туташ ҳолда 16 метрли мезана-минора пишиқ ғиштдан безакли қилиб тикланган, "Аллоҳ, Мұхаммад" деган ёзувлари бор. Масжид 3 минг намозхонга мўлжалланган. Мулла Бозор Охунд мақбарасида олим дафн этилган. Асосининг ўқ чизиги 6 метр, умумий баландлиги 24 метр. Беш қиррали кўпбурчак шаклида аввал 8 метр ва кейин етти қиррали кўпбурчак шаклида призма қилиб қурилган. Устига доира шаклидаги қисм ва гумбаз барпо этилган. Мақбара қўриниши ва тузилиши исломдаги шариат, тариқат қонунларини рамзий тарзда ифода этади. Мақбаранинг дастлабки беш қиррали қисми исломдаги 5 амални, кейинги 7 қиррали қисми имондаги 7 шартни, доира шаклидаги 40 та қирра 40 фарзни ифодалайди. Бу қисмга "Бисмиллаҳир раҳманир роҳийм, Аллоҳ" деб ёзилган. Мақбара қурилишида пишиқ ғишт, темир-бетон, сопол кошинлар, ёғоч эшик ва панжаралардан фойдаланилган.

**Фойдаланган адабиётлар**

- 1 Наманган вилоят тарихи ва маданияти давлат музейида сақланаётган ноёб экспонатлар каталоги**
- 2 Мозийдан садо журнали. 2016 йил 69-сони**
- 3 Интернет сайти.**